

# Neuzeuger Messerer Rud

Rudenkirtag Sierning Faschingdienstag am 5.3.2019

d'Neuzeuger Messerer Rud  
sägt ohne Tanzherr heut Griaß Gott  
s'erste Mål seit zwoanzg Joahrn  
miaß ma ohne Titl fahrn  
åber uns kå´ nix vabiagn  
låssn uns net unterkriagn  
fürs Tanzherrnrudn–Ehre trågn  
möcht ma ön Hans Vagelts Gott sågn

d'Gerlinde Hofer, toats losn  
kafft ön Ausvakauf a Hosn  
für ihrn Må´ zan Schifoahrn  
leider is dö Hosn z´kloan  
muaß ihr s'Geld ausganga sei  
drum hát da Sepp amål, oh mei  
an ganzn Tåg ohne Vadriaßn  
mit off´ner Hosn Schifoahrn miaßn

d'Ackerl Marietta, ohne Schmarrn  
is mitn E-bike ausgfahrn  
ihr Lebnsghoahr, da Hans, vorå´  
ba oana Kreuzung quert a Må´  
a fescher Kampl, der bleibt steh  
red´t d'Marietta å´, oje  
sie hauts um, glei, deswegn  
und da Armbruch is scho gschehgn

Da Sturl Thomas, stöllts enk vor  
is ah scho dreißg Joahr  
gfeiert wird lang und schwer  
da kimmt s'Geburtstågsgschenk daher  
da Schrefler hát vor d'Haustür gschickt  
a Fuhr Schotter hi´kippt  
seither is da Thomas scho  
wohl a stoalreicher Må´

d'Angerer Hanni, va dö Lindlbaurn  
fahrt nåch Steyr zwegn ihrn Schau´n  
da Må´ schreit nåchi, tankn solls  
sie schreit z´ruck, es passt ålls  
hundert Meter vor da Stådt  
streikt da Motor, oh Gott  
hát mehr Diesl braucht, z´letzt  
weil sie ihr Gwicht hát unterschätzt

Kultur in Siern'g is ållweil gfrågt  
hábn a paar junge Måndscha gsågt  
für d'H-L-W a guats Projekt  
recht vül Årbat drinnan steckt  
a Themenweg draus entsteht  
hoffan schwaar, dass den wer geht  
dö Tåfln san já volla Schrift  
und s'Lesn is für vül a Gift

Da Schupfer Viktor, goar net fad  
is a Künstler mit Format  
hát im neuchn Gmeindebau  
a Porträt gmålt, schauts ös å´  
ziemli schwarz is's wordn dös Büld  
a Vadåcht entsteht damit  
dass in da rotn Gmoa gwiß  
a Schwarzmåler drinnan is

Im Siernger Kranknhauskaffe  
sitzn ban Frühschoppn, auweh  
a Schübl Weiba, d'Resi, d'Rosi  
d'Gerlinde, d'Christl, d'Hermi, d'Poldi  
laut is's wordn und glei nåcha  
habns dö Schallmauer durchbrocha  
dö Sterbenskrankn habn scho gfluacht  
um Totnstille angsuacht

Dö Frau Edeltraud Ritt  
feiert ihrn Fufzga, gsund und fit  
ihr Må´, da Pold, wird müad dabei  
legt sih auf d'Bank ön Fokus drei´  
schnarcht, daweil dö hålbert Nåcht  
ös Weib alloa ön Å´wåsch måcht  
dös is, ohne zu bestreitn  
wia in schönstn, åltn Zeitn

A schlauer Fuchs, goar und ganz  
is da Großauer Hans  
hát in da Hosntåschn drei´  
ållweil Hörstoppln dabei  
dass er ban Kathreinkonzert  
dö fålschn Töne net so heart  
und nebñ da Gabi, sein´ Wei´  
då braucht er´s sowieso ållweil

Hauptschuldirektions-Leiter  
is d' Susanne Wührleitner  
a starke Frau in ihrer Branch'  
hât a Vorliab für orang'  
orange Hoar, oranges Gwand  
oranger Wågn, nuh ållahand  
da Schulwart Christian hât gsågt  
dös is da orange Gott

Bezirksbauernkammer z' Ådlwang  
Holzhaus Oans steht nuh net lang  
Eröffnung im September gråd  
ålls, wås Rang und Namen hât  
war ei' glådnt zu Trank und Essn  
nur uns Rudn habns vagesn  
d' Regina, d' Traudi, d' Gabi wolln  
heut bestimmt ålls nåchholn

Da Auer Naz, der arme Må'  
pöcklt um ön Wåld herdå'  
kriagt a Schiene mit Reifn  
um dös Haxerl zu vasteifn  
sei Frau, dö Inge, ohne Schwips  
bricht sih d' Hand und kriagt an Gips  
zwoa steife Glieder, so a Gschiß  
doh koas davo zan Braucha is

d' Bezirkshauptfrau Breitwieser Carmen  
möcht ma griabn und umarmen  
a sportlich fesche, junge Frau  
dö nur freindli lächln kå'  
hoff ma, dass dös ah so bleibt  
wanns erfåhrn muaß in da Zeit  
dass ihr Lächln sicher fåst  
va Rechts Wegn heut an Liter kost'